

आकाशवाणी

खबरां ----

1 भगवान जगन्नाथ, भगवान बलभद्र, देवी सुभद्रा ते भगवान सुदर्शन हुंदी दुनिया भरै च मशहूर रथ जातरा अज्ज संझा थमां ओडिशा दे पुरी च शुरू होई गई ऐ।

2 केंद्री मंत्री ते बीजेपी दे सीनियर नेता पीयूष गोयल होरें आखेआ ऐ जे पिच्छले 10एं बरें च कीते गेदे शानदार कम्में करी गै लोकें एन.डी.ए दी सरकार गी त्रीये कार्यकाल लेई जनादेश दिता ऐ।

3 प्रधानमंत्री नरेंद्र मोदी होर कल्लै थमां रूस ते आस्ट्रिया दे त्र'ऊं दिनें दे सरकारी दौरै पर रवाना होंगन।

4 प्रशासनिक सुधारें ते सार्वजनिक शकैतें सरबन्धी विभाग दा 5 मिम्बरी भारती डेलीगेशन अज्जै थमां त्र'ऊं दिनें दी कोलंबो दी जातरा शुरू करै करदा ऐ।

5 भारती मौसम विभाग नै उत्तराखंड दिएं किश थाहरें सनें उत्तर प्रदेश, ओडिशा, मध्य महाराष्ट्र ते दक्खनी अंदरूनी कर्नाटक च बड़ी भारी बरखा दी पेशगोई कीती ऐ।



ते हुन खबरें दी तफसील।

## Odisha

भगवान जगन्नाथ, भगवान बालभद्र, देवी सुभद्रा ते भगवान सुदर्शन हुंदी दुनिया भरै च मशहूर रथ यात्रा अज्ज संझा ओडिशा दे पुरी च शुरू होई गई। रथ जातरा दे मद्देनजर पवितर पुरी धाम दे गैंड ट्रंक रोड पर आस्था च लीन श्रद्धालुएं दा समुंद्र जन उमड़ी आए दा ऐ। राष्ट्रपति द्रौपदी मुर्मू होर बी इस सालाना उत्सव च शामिल होइयां न जित्थे दुनिया भरै थमां लक्खां बद्दे श्रद्धालु रथ खिच्चने ते भगवान जगन्नाथ हुंदे दर्शनें लेई किट्ठे होए दे न। पवितर रथें गी जगन्नाथ मंदरै थमां श्री गुंडिचा मंदर लेता जंदा ऐ जित्थे इक्क हफ्ते तगर रूकने परेंत एह रथ वापस औंदे न ते एहदे कन्नै एह उत्सव सम्पन्न होई जंदा ऐ। राज्य सरकारै इस महत्वपूर्ण आयोजन गी बवस्थित ढंग्गै सिर सम्पन्न कराने लेई सब्बै लोड़चदे प्रबंध कीते देन। कन्नू बवस्था बनाई रक्खने ते भीड़ गी काबू च करने लेई सुरक्षाकर्मिं दिआं 180 पलटनां तैनात न। आर्टिफिशल इंटेलीजेस कन्नै लैस सीसीटीवी कैमरे बी लाए गेदे न। राज्य सरकारै रथ जातरा लेई दऊं दिनें दी सरकारी छुट्टी दा ऐलान बी कीते दा ऐ।



## SC-NEET

सुप्रीम कोर्ट च कल नीट-यू जी सरबंधत केई याचिकाएं पर सुनवाई होग। इंदे च नमें सिरेया मतेयान कराने दी मंग आलियां अर्जियां बी शामिल न। सुप्रीम कोर्ट नै वेबसाइट पर अपलोड कीती गेदी काज-लिस्ट मुजब प्रधान नयायधीश डी.वाई चंद्रचूड़ ते न्यामूर्ति पारदीवाला ते न्यामूर्ति मनोज मिश्रा हुंदी पीठे दे सामने 26 याचिकाएं गी सुनवाई लेई रखेआ जाग। विद्यार्थिएं अपनी याचिकाएं च नीट च कथित बेकायदगिएं दी इक्क बक्खरी ते सुतंत्र जांच कराने दी मंग कीती ऐ। बधदे नीट विवाद दे चलदे केंद्र सरकार नै सुप्रीम कोर्ट च हल्फनामा दायर कीता ऐ। केंद्र नै आखेआ ऐ जे इस मतेयान च बड्डे पैमाने पर गड्डिएं ते बेजाबतिएं दे सबूत दी कमी दे चलदे नीट-यूजी 2024 गी परतिए नमें सिरेआ करेआने दी कोई लोड नेई ऐ। केंद्र नै अपने हल्फनामे च एह तर्क बी दिता ऐ जे नमे ंसिरेआ मतेयान कराने कन्नै लक्खां मेदवार जिंदा कोई कसूर नेई ऐ, उंदे जीवन पर बी गलत असर पेई सकदा ऐ। राष्ट्रीय परीक्षा एजेंसी एनटीए मुख्य भरै च सरकारी ते निजी संस्थानें च M.B.B.S, B.D.S, आयूष ते होर सरबंधित पाठ्यक्रमें च दाखले लेई नीट-यूजी दा मतेयान बी लेंदी ऐ।

## PM-Russia

प्रधानमंत्री नरेंद्र मोदी होर कल्लै थमां रूस ते आस्ट्रिया दे त्रऊ दिनें दे दौरे पर रवाना होंगन। जातरा दे पैहले चरण च ओह रूस दी राजधानी मास्को च 22में भारत-रूस सालाना शिखर सम्मेलन च शामिल होंगन। श्री मोदी हुंदी एह जातरा रूस दे राष्ट्रपति व्लादिमीर पुतिन हुंदे सादते पर होआ करदी ऐ। सम्मेलन च दौनें नेताएं बशकार आपसी सरबंधें दे सब्बनें पैहलुएं दी समीक्षा कीती जाग ते आपसी हित दे इलाकाई ते वैश्विक मुद्दें पर विचार-बटांदरा होग। रूस दी जातरा दे बाद प्रधानमंत्री होर मंगलवारें आस्ट्रिया पुज्जंगन। पिच्छले 41एं बरें च कुसै भारती प्रधानमंत्री दी आस्ट्रिया दी एह पैहली जातरा होग। श्री मोदी होर मास्को दे कन्नोकन्नी वियना च बी भारती समुदाय दे लोकें कन्नै गल्लबात करंगन। आकाशवाणी संवाददाता मुजब भारत ते रूस बशकार सालाना शिखर सम्मेलन च सब्बनें दपक्खी मुद्दें दी समीक्षा कीती जाग। एहदे च रक्षा, बपार, निवेश, उर्जा सैहयोग, विज्ञान ते टेक्नोलाजी, शिक्षा, संस्कृति ते लोकें बशकार आपसी संपर्क शामिल ऐ। दौनें नेता ब्रिक्स, एससीओ, जी-20 पूर्वी एशिया शिखर सम्मेलन ते संयुक्त राष्ट्र जनेय मंचें च दपक्खी सरबंधें दी स्थिति दा बी आंकलन करंगन। अपनी जातरा दे दुए चरण च श्री मोदी आस्ट्रिया दे राष्ट्रपति

अलेक्जेंडर वान डेर बेलेन हुंदे नै मलाटी करंगन ते वियना च  
आस्ट्रिया दे चांसलर कार्ल नेहमर हुंदे नै बी गल्लबात करंगन। दौनें  
नेता दौनें मुखें दे बपारिक प्रमुखें गी बी संबोधित करंगन।

<><><><><><><><>

### **Murugan-Tirumala**

केंद्री सूचना ते प्रसारण राज्यमंत्री डॉ. एल. मुरुगन होरें अज्ज अपने  
परोरें कन्नै तिरुमाला श्री वेंकेटश्वर स्वामी दे दर्शन कीते। मंदर दे  
बाहर मीडिया कर्मियें कन्नै गल्ल करदे होई श्री मुरुगन होरें आखेआ  
जे उनें मुखें दे सब्बनें लोकं दी खुशहाली आस्तै श्री वेंकेटश्वर स्वामी  
अग्गे प्रार्थना कीती। इस अवसर पर डॉ. मुरुगन होरें आखेआ जे  
2047 तगर भारत विकसित राश्ट्र बनी जाग।

<><><><><><><><>

### **Budget-Session**

संसद दा बजट सत्र इस म्हीने दी 22 तरीक थमां शुरू होग। पार्लिमानी  
मामले दे मंत्री किरें रिजिजू होरें इक सोशल मीडिया पोस्ट च  
दस्सेआ जे बजट सत्र 12 अगस्त तगर चलोग। उनें आखेआ जे  
केन्द्रीय बजट 2024-25 लोकसभा च 23 जुलाई गी पेश कीता जाग।

रिजिजू होरें दस्सेआ जे राष्ट्रपति द्रौपदी मुर्मू होरें बजट सत्र आस्तै दौनें सदनं दा सत्र सदने दे केन्द्र सरकार दे प्रस्ताह गी मंजूरी देइ दिती ऐ। लगातार त्रीह बारी प्रधानमंत्री बनने परेंत एह नरेन्द्र मोदी हुंदी अगुवाई आली सरकार दा पैहला बजट होग। दौनें सदनें दे सांझे इजलास गी संबोधत करदे होई राष्ट्रपति होरें दोहाया हा जे एह बजट सरकार दी नीतिएं ते भविक्ख दी सोच गी दर्शाने आला बजट होग।

<><><><><><>

### **Madhya Pradesh Plantation Drive**

प्रधानमंत्री नरेंद्र मोदी हुंदे एक पेड़ मां के नाम अभियान दे संकल्प दे अंतर्गत मध्य प्रदेश दे मुख्यमंत्री डॉ. मोहन यादव ते केंद्री जंगलात ते पर्यावरण मंत्री भूपेंद्र यादव होरें अज्ज इंदौर दे सीमा सुरक्षा बल रेंज क्षेत्र च बूटा लाने आहले अभियान च भागीदारी कीती। उनें अपनी-अपनी मां दे चेतें च बूहटा बी लाया। इस कार्यक्रम गी संबोधित करदे होई मुख्यमंत्री मोहन यादव होरें आखेआ जे इंदौर दी मुख्खै ते दुनिया च इक्क विशेष पंछान ऐ। इंदौर इक्क स्वच्छ शहर ऐ ते एह हराभरा शहन बनने च पैहली थाहरा पर होग।

<><><><><><>

### **DARPG**

प्रशासनिक सुधारें ते सार्वजनिक शकैतें सरबंधीं विभाग दा 5 मैम्बरी  
भारती प्रतिनिधिमंडल अज्जै थमां त्रै दिनें दी कोलंबो दी अपनी जातरा  
शुरू करै करदा ऐ। इस डेलीगेशन दी अगुवाई राष्ट्री सुशासन केंद्र दे  
सचिव ते महानिदेशक बी श्री निवास होर करंगन ते ओह इस दरान  
श्रीलंका दे सिविल सेवकें दे समर्थ निर्माण कार्यक्रम पर चर्चा करंगन।  
इस जातरा दरान इनें उपाएं पर इक लम्मी मुद्दत आले सैहमति पत्र  
पर दस्तखत होने दी बी मेद ऐ।

<><><><><><>

### **BSPA Mayavati**

बहुजन समाज पार्टी प्रमुख मायावती नै तमिलनाडू च पार्टी दे प्रदेश  
अध्यक्ष के. आर्मस्ट्रांग दी हत्या लेई सीबीआई जांच दी मंग कीती ऐ।  
अज्ज चेन्नई च आर्मस्ट्रांग गी श्रद्धांजलि दिंदे होई उनें आखेआ जे  
उंदी पार्टी इस मामले च निष्पक्ष जांच कराने उप्पर जोर पाग।  
तमिलनाडू च हाल च होई दिएं हत्याएं उप्पर ध्यान दिंदे होई  
मायावती होरें राज्य सरकारै गी आरक्षित समुदाय दी सुरक्षा ते कनून  
लेई बवस्था बनाने आस्तै अपील कीती। मायावती दे अलावा बी.सी.के  
नेता थोल थिरूमावालावन, कांग्रेस सांसद शशिकांत सैथिल, वाशीकरण,  
आम आदमी पार्टी दे प्रदेश अध्यक्ष ते केई होर नेता दिवंगत नेता गी

श्रद्धांजलि देआ रदे न। इक्क होर घटनाक्रम च उच्च न्यायालय नै पार्टी मुख्यालय च आर्मस्ट्रांग गी दफन करने दी अनुमति उप्पर तुरत सुनवाई करदे होई आखेआ जे उनेंगी उत्थे दफनाना संभव नेई ऐ, कीजे एह इक्क निक्का रिहायशी क्षेत्र ऐ। न्यायालय दा आखना हा जे एहदे लेई 200 फुट जमीन इस्तेमाल कीती जाई सकदी ऐ जिसी देने आस्तै राज्य सरकार त्यार नेई ऐ। इस बारे च याचिकाकर्ता गी सरकार गी संपर्क करना लोड़चदा।

<><><><><><>

### **Traffic-Advisory**

अमरनाथें दी जारी सलाना यात्रा दे मद्देनजर ट्रैफिक पुलस नै कश्मीर घाटी आली बक्खी जाने आहलियें गड्डिउएं लेई विशेष सलाह जारी कीती ऐ तां जे ना ते आम यात्रियें ते ना गै श्री अमरनाथ जी दे श्रद्धालुएं गी कुसै चाल्ली दी दिक्कत परेशानी पेश आवै जेड़े जहारें दी गिनतरी च हर रोज जम्मू थमां पैहलगाम ते बालटाल लेई रवाना होंदे न। एस.एस.पी ट्रैफिक रोहित बसकोत्रा होरें आखेआ ऐ जे दिनें 12 बजे कोला बाद नगरोटा ते 3 बजे दे बाद बनिहाल कोला अग्गे कोई यात्रा दी गड्डी नेई जाग।

